

**ილიას სახელმწიფო უნივერსიტეტის  
საბუნებისმეტყველო მეცნიერებებისა და მედიცინის ფაკულტეტის  
სადისერტაციო საბჭოსა და დოქტორანტურის დებულება**

**თავი I ზოგადი დებულებები**

**მუხლი 1. მოქმედების სფერო და მიზნები**

1.1. ეს დებულება განსაზღვრავს ილიას სახელმწიფო უნივერსიტეტის საბუნებისმეტყველო მეცნიერებებისა და მედიცინის ფაკულტეტის სადისერტაციო საბჭოს შედგენისა და საქმიანობის წესს, სადისერტაციო საბჭოს თავმჯდომარის არჩევის წესს, დოქტორის აკადემიური ხარისხის მინიჭების კრიტერიუმებს, დოქტორანტურაში მიღების წესს, დოქტორანტურის აკადემიურ შინაარსს და ხელმძღვანელის/თანახელმძღვანელის ძირითად ფუნქციებს/მოვალეობებს, დოქტორანტურის მიზნებს, სადისერტაციო ნაშრომის დაცვის წესს, ხოლო ამ საკითხებთან დაკავშირებული დავების წარმოშობის შემთხვევაში, მათი გადაჭრისა და მიღებული გადაწყვეტილების გასაჩივრების წესს;

1.2. დოქტორანტურის ძირითადი მიზნებია ახალი თაობის მომზადება მეცნიერებაში, უნივერსიტეტის სასწავლო და კვლევითი პოტენციალის განვითარება და გაფართოება;

1.3. სადოქტორო პროგრამის წარმატებით დასრულების შემთხვევაში, სტუდენტი იღებს დოქტორის აკადემიურ ხარისხს. სტუდენტს ენიჭება ეს ხარისხი იმ შემთხვევაში, თუ მან:

- ა) გამოავლინა საკუთარი სფეროს/დარგის უახლეს მიღწევებზე დამყარებული ცოდნა;
- ბ) გამოავლინა კვლევის დამოუკიდებლად დაგეგმვისა და განხორციელების უნარი;
- გ) განახორციელა ორიგინალური კვლევა, რომელიც აფართოებს ცოდნის საზღვრებს და რომელიც გამოქვეყნდა მაღალციტირებად სამეცნიერო პერიოდულ გამოცემებში;
- დ) აქვს ახალი, რთული და წინააღმდეგობრივი იდეებისა და მიდგომების კრიტიკული ანალიზის, შეფასებისა და სინთეზის უნარი, საერთაშორისო სამეცნიერო საზოგადოებასთან თემატურ პოლემიკაში ჩართვის უნარი.

1.4. დოქტორანტურის ფარგლებში განხორციელებული კვლევითი პროექტები შეესაბამება უნივერსიტეტის მისიას, მიზნებსა და სტრატეგიას;

1.5. სადოქტორო საგანმანათლებლო პროგრამები ხორციელდება უნივერსიტეტში არსებული სამეცნიერო-კვლევითი ერთეულების ბაზაზე;

1.6. ფაკულტეტს შეუძლია სადოქტორო საგანმანათლებლო პროგრამის განხორციელებაში ჩართოს სხვა სამეცნიერო-კვლევითი დაწესებულებები ან კლინიკები უნივერსიტეტის მიერ გაფორმებული ხელშეკრულების საფუძველზე(ცვლილება 17.02.2020);

1.7. საბუნებისმეტყველო მეცნიერებებისა და მედიცინის ფაკულტეტი შესაძლოა ახორციელებდეს საგანმანათლებლო პროგრამებს ადგილობრივი ან საერთაშორისო თანამშრომლობის ფარგლებში, რომელიც ითვალისწინებს სტუდენტების გაცვლას ან ერთობლივი, ორმაგი ან რამდენიმე ხარისხის მინიჭებას.

**მუხლი 2. სადისერტაციო საბჭო**

2.1. დოქტორის აკადემიური ხარისხის მინიჭების მიზნით საბუნებისმეტყველო მეცნიერებებისა და მედიცინის ფაკულტეტის საბჭო ქმნის შესაბამისი დარგის/სპეციალობის მიხედვით

სადისერტაციო საბჭოს. ინტერდისციპლინური კვლევის შემთხვევაში, დარგობრივი კომისია იღებს გადაწყვეტილებას შესაბამისი საბჭოს წევრის/წევრების ნომინირების შესახებ;

2.2. სადისერტაციო საბჭო იქმნება ყოველი კონკრეტული დისერტაციის განხილვისათვის და დოქტორის აკადემიური ხარისხის მინიჭებისთვის;

2.3. საბუნებისმეტყველო მეცნიერებებისა და მედიცინის ფაკულტეტის სადისერტაციო საბჭოები იქმნება ფაკულტეტის შესაბამისი დარგის/სპეციალობის დოქტორის აკადემიური ხარისხის მქონე ყველა პროფესორისა და ასოცირებული პროფესორისაგან; აგრეთვე ფაკულტეტის დამოუკიდებელი სამეცნიერო-კვლევითი ერთეულის (ასეთის არსებობის შემთხვევაში) შესაბამისი დარგის/სპეციალობის უფროსი მეცნიერი თანამშრომლისა და მთავარი მეცნიერი თანამშრომლისაგან, რომელთაც აქვთ დოქტორის აკადემიური ხარისხი. სადისერტაციო საბჭოს შემადგენლობაში არ შეიძლება შედიოდნენ სამეცნიერო ხელმძღვანელი, თანახელმძღვანელი და რეცენზენტი, გარდა იმ შემთხვევისა, როცა საერთაშორისო შეთანხმებით ან/და სხვა პარტნიორული ხელშეკრულებით დადგენილია და შეთანხმებულია განსხვავებული პირობები;(ცვლილება 17.02.2020);

2.4. სადისერტაციო საბჭოს შემადგენლობაში უნდა შედიოდეს მინიმუმ ერთი მოწვეული წევრი, ადგილობრივი ან საერთაშორისო საგანმანათლებლო ან კვლევითი დაწესებულებიდან. მოწვეული წევრი უნდა იყოს დოქტორის აკადემიური ხარისხის მქონე შესაბამისი დარგის წარმომადგენელი სპეციალისტი/მკვლევარი/აკადემიური პერსონალი/მეცნიერ-თანამშრომელი, რომელსაც დარგის სპეციფიკიდან გამომდინარე, აქტიური მონაწილეობა აქვს მიღებული სამეცნიერო კვლევებში და გამოქვეყნებული აქვს სამეცნიერო ნაშრომი/ები, რომლებიც შეესაბამება დოქტორანტის სადისერტაციო ნაშრომის ზოგად თემატიკას/მიმართულებას. მისი მოწვევა უნდა მოხდეს შემდეგი წესის დაცვით: დარგობრივი კომისია მოიძიებს სადისერტაციო საბჭოს პოტენციურ წევრს და მისი წერილობითი თანხმობის შემთხვევაში, ფაკულტეტის საბჭოს წარუდგენს კანდიდატურას დამტკიცების მიზნით, მოწვეულ წევრთა რაოდენობა არ უნდა აღემატებოდეს სადისერტაციო საბჭოში ფაკულტეტის წარმომადგენლების წევრთა რაოდენობას;

2.5. ფაკულტეტის შესაბამისი დარგის/სპეციალობის სადისერტაციო საბჭოს წევრობისა და რეცენზენტების კანდიდატთა სიას ფაკულტეტის საბჭოს დასამტკიცებლად წარუდგენს შესაბამისი დარგობრივი კომისია. ასევე, დარგობრივი კომისია ფაკულტეტის საბჭოს ასარჩევად წარუდგენს სადისერტაციო საბჭოს თავმჯდომარის კანდიდატურას;

2.6. იმ შემთხვევაში, თუ სადისერტაციო ნაშრომის შესრულება ან/და დაცვა ხდება ინგლისურ ენაზე, შესაბამისი დარგის/სპეციალობის სადისერტაციო საბჭოში უნდა შედიოდნენ შესაბამისი დარგის/სპეციალობის დოქტორის აკადემიური ხარისხის მქონე პროფესორები/ასოცირებული პროფესორები, რომელთაც გააჩნიათ ინგლისური ენის კომპეტენცია. აღნიშნული კომპეტენციის დადგენა და პასუხისმგებლობა ეკისრება დარგობრივ კომისიას.

2.7. შესაბამისი საფუძვლის არსებობის შემთხვევაში, დოქტორანტს უფლება აქვს, აცილება მისცეს სადისერტაციო საბჭოს წევრს/წევრებს, რა შემთხვევაშიც ის არგუმენტირებულ განცხადებას წერს ფაკულტეტის დეკანის სახელზე. განცხადება განიხილება დარგობრივი კომისიის მიერ დეკანის მონაწილეობით. მიღებული გადაწყვეტილება ეცნობება დოქტორანტს. სადისერტაციო საბჭოს წევრი/წევრები შეიძლება შეიცვალოს იმ პრინციპით, რა პრინციპითაც ხდება სადისერტაციო საბჭოს შექმნა;

2.8. სადისერტაციო საბჭო გადაწყვეტილება უნარიანია, თუ მას ესწრება წევრთა საერთო რაოდენობის ნახევარზე მეტი;

2.9. ფაკულტეტის საბჭოს მიერ შექმნილი სადისერტაციო საბჭო თავის შემადგენლობიდან საბჭოს მდივანს ირჩევს ღია კენჭისყრით, რომელიც როგორც გადაწყვეტილება, აისახება სადისერტაციო საბჭოს ოქმით;

2.10. სადისერტაციო საბჭოს სხდომის მიმდინარეობა აისახება ოქმში, რომელსაც ხელს აწერენ საბჭოს თავმჯდომარე და მდივანი. ოქმს თან ახლავს ასევე სადისერტაციო საბჭოს სხდომაზე დამსწრე წევრთა ხელმოწერები.

### **მუხლი 3. დარგობრივი კომისია**

3.1. დარგობრივი კომისიები იქმნება ფაკულტეტის საბჭოს მიერ ფაკულტეტის დებულებით განსაზღვრული წესის შესაბამისად დარგის და მიმართულებების მიხედვით და შედგება უნივერსიტეტის დოქტორის აკადემიური ხარისხის მქონე პროფესორებისაგან და ასოცირებული პროფესორებისაგან. ინგლისურენოვანი სადოქტორო პროგრამის შემთხვევაში დარგობრივი კომისიის წევრებს უნდა ჰქონდეთ ინგლისური ენის კომპეტენციაც. დარგობრივი კომისიის თავმჯდომარე და მდივანი აირჩევა კომისიის შემადგენლობიდან ღია კენჭისყრით;(ცვლილება 17.02.2020);

3.2. დარგობრივი კომისია მონაწილეობს დოქტორანტურაში მიღებასთან და სწავლასთან დაკავშირებულ საკითხებში, როგორცაა:

ა) დოქტორანტურაში ჩაბარების მსურველების განაცხადების განხილვა და შეფასება, მათთან ზეპირი გამოცდის ჩატარება;

ბ) პროსპექტუსის დაცვა;

გ) სადისერტაციო საბჭოს წევრთა სიის და თავმჯდომარის კანდიდატურის წარდგენა ფაკულტეტის საბჭოსათვის;

დ) სადისერტაციო ნაშრომის დაცვისათვის რეცენზენტების შერჩევა და წარდგენა ფაკულტეტის საბჭოსათვის;

ე) დოქტორანტის პუბლიკაციის შესაბამისობის დადგენა მის სადისერტაციო თემასთან და შესაბამისი დასკვნის (ოქმის სახით) წარდგენა, დეკანის სახელზე უნივერსიტეტის ხარისხის უზრუნველყოფის სამსახურისათვის წარდგენის მიზნით;

ვ) დოქტორანტის მიერ ხელმძღვანელის შეცვლის, თანახელმძღვანელის დამატების ან ხელმძღვანელის მიერ სამეცნიერო ხელმძღვანელობაზე უარის განაცხადების განხილვა და გადაწყვეტილების მიღება;

ზ) დოქტორანტის მიერ კვლევის თემატიკის ან მიმართულების შეცვლის განაცხადის განხილვა და გადაწყვეტილების მიღება;

თ) დოქტორანტის სტატუსის აღდგენის შემთხვევაში მისი კვლევითი თემატიკის აქტუალობის განხილვა;

ი) სადისერტაციო ნაშრომის უცხოურ ენაზე შესრულებისა და დაცვის შესახებ გადაწყვეტილების მიღება.(დამატება 17.02.2020);

3.3. ამ მუხლის 3.1. და 3.2. პუნქტებით განსაზღვრული პირობები შესაძლოა არ გავრცელდეს ადგილობრივი და საერთაშორისო შეთანხმების ან/და სხვა ხელშეკრულებით დადგენილი პირობების ფარგლებში.

### **მუხლი 4. ადმინისტრაციული მხარდაჭერა**

სადისერტაციო საბჭოს და დარგობრივი კომისიების ადმინისტრაციულ მხარდაჭერას ისევე, როგორც ყველა სახის საქმისწარმოებას ახორციელებს საბუნებისმეტყველო მეცნიერებებისა და მედიცინის ფაკულტეტის ადმინისტრაცია.

### **თავი II. დოქტორანტურაში მიღება**

### **მუხლი 5. დოქტორანტურაში სწავლის უფლება**

დოქტორანტურაში სწავლის უფლება აქვს მაგისტრს ან მასთან გათანაბრებული აკადემიური ხარისხის მქონე პირს.

## **მუხლი 6. დოქტორანტურაში მიღება**

6.1. დოქტორანტურაში მიღებას, ფაკულტეტის საბჭოს ან დეკანის წარდგინების საფუძველზე, აცხადებს რექტორი. მიღება შეიძლება გამოცხადდეს როგორც შემოდგომის, ისე გაზაფხულის სემესტრისათვის. დოქტორანტურაში სწავლის მსურველმა უნდა წარმოადგინოს შემდეგი დოკუმენტები:

ა) შევსებული განაცხადი;

ბ) მაგისტრის ან მასთან გათანაბრებული აკადემიური ხარისხის დამადასტურებელი საბუთის ასლი (5 წლიანი განათლების დიპლომი ან უცხოეთში მიღებული განათლების დამადასტურებელი დიპლომის აღიარება უნდა იყოს დადასტურებული განათლების ხარისხის განვითარების ეროვნული ცენტრის მიერ);

გ) პირადობის მოწმობის ასლი;

დ) 2 ფოტოსურათი და მათი ელ.ვერსია;

ე) ავტობიოგრაფია (CV);

ვ) შესაბამის სადოქტორო პროგრამაზე მიღებისთვის დამტკიცებული, აპლიკანტის მიერ შევსებული და მისი პოტენციური ხელმძღვანელის ხელმოწერილი კვლევის განაცხადი, რომლებიც განთავსებული უნდა იყოს უნივერსიტეტის ვებგვერდზე პროგრამაზე ყოველი მიღების გამოცხადებისთანავე; უნივერსიტეტებს შორის პარტნიორული, ადგილობრივი ან საერთაშორისო შეთანხმების შემთხვევებში, აპლიკანტს შეიძლება არ მოეთხოვებოდეს ხელმძღვანელის თანხმობა;

ზ) სხვა დოკუმენტები/პირობები, რომელსაც შეიძლება ითხოვდეს ცალკეული პროგრამა.

6.2. რექტორის ინდივიდუალური ადმინისტრაციულ-სამართლებრივი აქტით შესაძლოა განისაზღვროს დამატებით წარმოსადგენი დოკუმენტაცია;

6.3. დოქტორანტობის კანდიდატები გადიან ტესტირებას ინგლისურ ენაში (B2 დონე). ტესტირების მინიმალური ზღვარი დგინდება ყოველი პროგრამისთვის ინდივიდუალურად, მიეთითება პროგრამაზე მიღების პირობებში და მიღების გამოცხადების შესახებ ფაკულტეტის წარდგინებაში;

6.4. ინგლისური ენის ტესტისაგან თავისუფლდებიან აპლიკანტები, რომლებიც წარმოადგენენ შესაბამისი უცხო ენის ცოდნის დამადასტურებელ ვალიდურ საერთაშორისო სერტიფიკატს ან შეფასებისა და გამოცდების ეროვნული ცენტრის მიერ გაცემულ შესაბამის ვალიდურ სერტიფიკატს, რომელიც ადასტურებს კანდიდატის ენის კომპეტენციას პროგრამით გათვალისწინებული მინიმუმ B2 დონეზე. ტესტისაგან თავისუფლდებიან აგრეთვე ის აპლიკანტები, რომლებიც წარმოადგენენ საქართველოს ფარგლებს გარეთ ინგლისურენოვანი საბაკალავრო ან სამაგისტრო პროგრამის დასრულების დამადასტურებელ დიპლომს (დიპლომთან ერთად წარმოდგენილი უნდა იყოს განათლების ხარისხის ეროვნული ცენტრის მიერ გაცემული დოკუმენტი - უცხოეთში მიღებული განათლების აღიარების შესახებ). ასევე ის პირები, რომლებიც წარმოადგენენ საქართველოში ინგლისურენოვანი საბაკალავრო ან სამაგისტრო პროგრამის დასრულების დამადასტურებელ დიპლომს და დანართს ან ცნობას პროგრამის განხორციელების ენის შესახებ;

6.5. ინგლისური ენის ცოდნის დამადასტურებელი ვალიდური სერტიფიკატების შესაბამისი დონეები და ქულები გაიწერება ცალკეული პროგრამების კურიკულუმებში;

6.6. ინგლისურიენის გამოცდის წარმატებით ჩაბარების ან ცოდნის დადასტურების შემდეგ კანდიდატების მიერ პროგრამაზე წარმოდგენილი კვლევითი განაცხადი და სხვა დოკუმენტები/ფორმები იგზავნება შესაბამისი დარგობრივი კომისიის წევრებთან

განსახილველად და შესაფასებლად. პოტენციური ხელმძღვანელი კანდიდატის შეფასებაში არ იღებს მონაწილეობას. განაცხადის მოთხოვნები, შეფასების კრიტერიუმები და რუბრიკები დგინდება ყოველი პროგრამისთვის ინდივიდუალურად და განთავსდება უნივერსიტეტის ვებგვერდზე ყოველი მიღების გამოცხადებისთანავე. დამაკმაყოფილებელი შეფასების მიღების შემთხვევაში, აპლიკანტი გაივლის ზეპირ გამოცდას;

6.7. დარგობრივი კომისიის მიერ ზეპირი გამოცდის შეფასება ხდება წინასწარ განსაზღვრული მოთხოვნების, კრიტერიუმების და რუბრიკების მიხედვით. ზეპირი გამოცდის მოთხოვნები, კრიტერიუმები და რუბრიკები ყოველი პროგრამისთვის დგინდება ინდივიდუალურად და განთავსდება უნივერსიტეტის ვებგვერდზე ყოველი მიღების გამოცხადებისთანავე. პარტნიორული, ადგილობრივი ან საერთაშორისო თანამშრომლობის შემთხვევაში, დოქტორანტის მიღებისა და ჩარიცხვის შესახებ გადაწყვეტილება შესაძლებელია მიღებულ იქნას განსხვავებული წესით;

6.8. სადოქტორო პროგრამის აპლიკანტის ერთიანი სარეიტინგო ქულის დაანგარიშების წესი ინდივიდუალურად განისაზღვრება ყოველი პროგრამისთვის და განთავსდება უნივერსიტეტის ვებგვერდზე პროგრამაზე მიღების გამოცხადებისთანავე;

6.9. დოქტორანტურაში სწავლის უფლება შეიძლება მიენიჭოს უცხოეთის უნივერსიტეტის კურსდამთავრებულს „უმაღლესი განათლების შესახებ“ საქართველოს კანონის მიხედვით;

6.10. კანდიდატმა მე-6 მუხლის 6.9 პუნქტით გათვალისწინებულ შემთხვევაში, მე-6 მუხლის 6.1 პუნქტით გათვალისწინებული დოკუმენტაციის გარდა უნდა წარმოადგინოს განათლების ხარისხის განვითარების ეროვნული ცენტრის მიერ გაცემული უმაღლესი განათლების დამადასტურებელი დოკუმენტის აღიარება.

## **მუხლი 7. მობილობა დოქტორანტურაში**

7.1. დოქტორანტურაში პირი შეიძლება ჩარიცხოს მობილობით საქართველოში მოქმედი კანონმდებლობისა და საუნივერსიტეტო წესის მიხედვით, პროგრამის წინაპირობების დაცვით;

7.2. ჩარიცხვისა და კრედიტების აღიარების შესახებ გადაწყვეტილებას იღებს ფაკულტეტი და მიღებულ გადაწყვეტილებას წარუდგენს რექტორს;

7.3. იმ შემთხვევაში, თუ სტუდენტი ახორციელებს საერთაშორისო მობილობას, სასწავლო კომპონენტის ფარგლებში მას უფორმდება შესაბამისი შეთანხმება (learning agreement). პროგრამის კომპონენტებში შეთანხმებით განსაზღვრული კრედიტების გათვალისწინება ხდება განათლების ხარისხის განვითარების ეროვნული ცენტრის მიერ კრედიტების აღიარების შემდეგ. იმ შემთხვევაში, როცა დოქტორანტი ახორციელებს საერთაშორისო მობილობას კვლევითი კომპონენტის ფარგლებში, მან ფაკულტეტზე უნდა წარმოადგინოს თავისი ხელმძღვანელის და თანახელმძღვანელის მიერ ხელმოწერილი კვლევის გეგმა (research agenda);

7.4 ეს მუხლი ვრცელდება ასევე იმ პროგრამებზე, რომელიც ხორციელდება პარტნიორული, ადგილობრივი და საერთაშორისო თანამშრომლობით თუ სხვა რამ არ არის დარეგულირებული აღნიშნული ხელშეკრულებებით.

## **თავი III. დოქტორანტურაში სწავლა**

### **მუხლი 8. დოქტორანტურის აკადემიური სტრუქტურა**

8.1. სადოქტორო პროგრამებს უნივერსიტეტის მისიისა და ინსტიტუტებში/ცენტრებში მიმდინარე კვლევითი პროექტების გათვალისწინებით შეიძლება საბუნებისმეტყველო მეცნიერებების და მედიცინის ფაკულტეტის აკადემიური პერსონალი გარე პარტნიორებთან ერთად და განსახილველად წარუდგენს ფაკულტეტის საბჭოს. ფაკულტეტის საბჭოს დადებითი გადაწყვეტილების შემთხვევაში, პროგრამა დასამტკიცებლად ეგზავნება აკადემიურ საბჭოს;

8.2. დოქტორანტურაში სწავლის ხანგრძლივობა არანაკლებ 3 და არა უმეტეს 5 წელია, თუ სხვა რამ არ არის გათვალისწინებული ინდივიდუალური გეგმით. იმ შემთხვევაში, თუ სტუდენტი ვერ ასრულებს პროგრამის მოთხოვნებს 5 წლის დასრულების შემდეგ, მას შეიძლება გაუფორმდეს დამატებითი ერთწლიანი ფასიანი ხელშეკრულება დარგობრივი კომისიის შუამდგომლობის საფუძველზე, შესაბამისი პირობების გათვალისწინებით;

8.3. დოქტორანტურის საგანმანათლებლო პროგრამის კომპონენტები, მათი თანმიმდევრობა და მოცულობა კრედიტებში განისაზღვრება ინდივიდუალურად, ყოველი სადოქტორო პროგრამისათვის;(ცვლილება 17.02.2020);

8.4. სადოქტორო პროგრამის სასწავლო კომპონენტი არ უნდა აღემატებოდეს 60 კრედიტს, ხოლო კვლევითი/შემოქმედებითი კვლევის კომპონენტის მოცულობის გაანგარიშება უნდა მოხდეს საქართველოს განათლების, მეცნიერების, კულტურისა და სპორტის მინისტრის 2019 წლის 10 აპრილის N 69/ნ ბრძანების დებულებათა გათვალისწინებით;(ცვლილება 17.02.2020);

8.5. დოქტორანტმა შეიძლება ისარგებლოს აკადემიური შვებულებით, სტატუსის შეჩერებით საუნივერსიტეტო წესის შესაბამისად; სტატუსის აღდგენის შემთხვევაში, დოქტორანტის საკვლევი თემის აქტუალობის საკითხს განიხილავს დარგობრივი კომისია დოქტორანტის ხელმძღვანელის წარდგინების საფუძველზე; 8.6. უნივერსიტეტში შეიძლება არსებობდეს ერთობლივი ან გაცვლითი სადოქტორო პროგრამები, რომელთა პირობები განისაზღვრება შესაბამისი დოკუმენტაციით (ხელშეკრულებები, მემორანდუმები, კურიკულუმები და ა.შ.).

## **მუხლი 9. სამეცნიერო ხელმძღვანელი**

9.1. სამეცნიერო ხელმძღვანელი უნდა იყოს უნივერსიტეტის პროფესორი, ასოცირებული პროფესორი, ასისტენტ-პროფესორი, პროფესორ-ემერიტუსი, რომელსაც აქვს დოქტორის აკადემიური ხარისხი, დოქტორანტის საკვლევი მიმართულების შესაბამისი სამეცნიერო-კვლევითი გამოცდილება, და არის უახლესი ცოდნით აღჭურვილი; დარგის სპეციფიკიდან გამომდინარე, აქტიური მონაწილეობა აქვს მიღებული სამეცნიერო კვლევებში და გამოქვეყნებული აქვს სამეცნიერო ნაშრომი, რომელიც შეესაბამება დოქტორანტის სადისერტაციო ნაშრომის ზოგად თემატიკას/მიმართულებას. იმ შემთხვევაში, თუ სადისერტაციო ნაშრომის დაცვა ხდება ინგლისურ ენაზე, სამეცნიერო ხელმძღვანელს უნდა ჰქონდეს ინგლისური ენის კომპეტენცია;(ცვლილება 17.02.2020);

დარგობრივი კომისია ყველა ამ პირობის შესრულებას ადასტურებს ჩანაწერით კვლევითი განაცხადის შეფასების შესაბამის ფორმაში.

9.2. ხელმძღვანელი თანხმობას დოქტორანტობის კანდიდატის სამეცნიერო ხელმძღვანელობაზე ადასტურებს სადოქტორო განაცხადის შესაბამის ფორმაზე ხელმოწერით. სადოქტორო პროგრამაზე კანდიდატის ჩარიცხვის შემთხვევაში, ხელმძღვანელი ერთვება დოქტორანტის სწავლის და კვლევის პროცესში. ცალკეულ შემთხვევებში, რომელიც დარეგულირებული იქნება უნივერსიტეტებს შორის თანამშრომლობის შეთანხმებით, შესაძლებელია სამეცნიერო ხელმძღვანელმა ხელმძღვანელობის თანხმობა განაცხადოს ამ შეთანხმებით გათვალისწინებული წესით;

9.3. საჭიროების შემთხვევაში, დოქტორანტს შეიძლება ჰყავდეს ერთზე მეტი დოქტორის აკადემიური ხარისხის მქონე აკადემიური ან სამეცნიერო თანამდებობის მქონე სამეცნიერო ხელმძღვანელი.

9.4. დასაშვებია, ასევე დოქტორანტს ჰყავდეს დოქტორის აკადემიური ხარისხის მქონე თანახელმძღვანელი, რომელიც მოწვეული იყოს სხვა, მათ შორის უცხო ქვეყნის, აკადემიური დაწესებულებიდან საერთაშორისო თანამშრომლობის შეთანხმების ფარგლებში ან დარგობრივი კომისიის გადაწყვეტილებით. თანახელმძღვანელი უნდა აკმაყოფილებდეს ხელმძღვანელისთვის განსაზღვრულ ყველა საკვალიფიკაციო მოთხოვნას;(ცვლილება 17.02.2020);

9.5. იმ შემთხვევაში, თუ სამეცნიერო ხელმძღვანელი/თანახელმძღვანელი უარს ამბობს დოქტორანტის ხელმძღვანელობაზე/თანახელმძღვანელობაზე, მან განცხადება უნდა წარუდგინოს ფაკულტეტის დეკანს;

9.6. სამეცნიერო ხელმძღვანელის/თანახელმძღვანელის შეცვლის სურვილის შემთხვევაში, დოქტორანტმა წერილობითი მოთხოვნით უნდა მიმართოს ფაკულტეტის დეკანს. დეკანი განსახილველად წარუდგენს დარგობრივ კომისიას და შესაბამისი გადაწყვეტილება ეცნობება დოქტორანტს;

9.7. სამეცნიერო ხელმძღვანელის ძირითადი ფუნქციები და მოვალეობებია:

სამეცნიერო ხელმძღვანელს რეგულარული კონსულტაციები აქვს დოქტორანტურის სტუდენტებთან. კონსულტაციების სიხშირე შეესაბამება პროგრამისა და საკვლევო თემის სპეციფიკას. კონსულტაცია მოიცავს დოქტორანტის პროგრესზე პერიოდულ უკუკავშირს, ზოგადი სამეცნიერო რჩევების მიცემას, კვლევის დიზაინსა და პროექტის მენეჯმენტში დახმარებას, ასევე თეზისის/სამეცნიერო-კვლევითი ნაშრომის/დისერტაციის წერის პროცესში, ადგილობრივ და საერთაშორისო სამეცნიერო ქსელში ინტეგრირების პროცესში, ადგილობრივ და საერთაშორისო სამეცნიერო ღონისძიებებში მონაწილეობისა და შედეგების წარდგენის პროცესში დახმარებას; აგრეთვე სამეცნიერო სტატიების რეფერირებად ჟურნალში გამოქვეყნების შესახებ რჩევების მიცემას. სამეცნიერო ხელმძღვანელი წარმოადგენს სადისერტაციო ნაშრომის შესახებ დასკვნას და უკუკავშირს;(ცვლილება 17.02.2020);

9.8. დოქტორის აკადემიური ხარისხის მქონე აკადემიური თანამდებობის მქონე პირი შეიძლება ერთდროულად ხელმძღვანელობდეს მაქსიმუმ ხუთი აქტიური სტატუსის მქონე დოქტორანტს. გამონაკლისი შეიძლება დაიშვას განსაკუთრებულ შემთხვევებში;

9.9. საერთაშორისო, პარტნიორული და ადგილობრივი თანამშრომლობის შემთხვევაში, სამეცნიერო ხელმძღვანელს შესაძლოა განესაზღვროს დამატებითი ფუნქციები და მოვალეობები, რომლებიც გაწერილი იქნება თანახელმძღვანელობის შესახებ შეთანხმებაში.

## **მუხლი 10. სადისერტაციო ნაშრომის გეგმა (პროსპექტუსი)**

10.1. სასწავლო პროგრამით დადგენილ ვადაში დოქტორანტმა დარგობრივი კომისიის წინაშე განსახილველად უნდა წარადგინოს სადისერტაციო ნაშრომის პროექტი - პროსპექტუსი, რომელშიც აღწერილი იქნება:

ა) თავფურცელი

ბ) შესავალი

გ) მასალა და მეთოდები

დ) ძირითადი საკვლევო საკითხები

ე) კვლევის არსებული და მოსალოდნელი შედეგები

ვ) კვლევის გეგმა

ზ) დისერტაციის სავარაუდო სტრუქტურა

თ) სადისერტაციო კვლევის შესრულების გრაფიკი

ი) სადისერტაციო კვლევის მატერიალური უზრუნველყოფა და კვლევის შეზღუდვები

კ) ბიბლიოგრაფია (პირველწყაროები, სამეცნიერო ლიტერატურა)

## **თავი IV. სადისერტაციო ნაშრომის წარდგენა, დაცვა და ხარისხის მინიჭება**

### **მუხლი 11. სადისერტაციო ნაშრომის წარდგენის პროცედურა**

11.1. დისერტანტმა სადისერტაციო ნაშრომი, რომელიც შეესაბამება სამეცნიერო პუბლიკაციის სტანდარტებს და გაფორმებულია ილიას სახელმწიფო უნივერსიტეტის აკადემიური სტილის

დაცვით, ორ ნაბეჭდ ეგზემპლარად და ელექტრონული სახით უნდა წარუდგინოს ფაკულტეტის ადმინისტრაციას;

11.2. დისერტაცია შესრულებული უნდა იყოს ქართულ ან ინგლისურ ენაზე. ინგლისურ ენაზე დისერტაციის შესრულების საკითხს (გარდა ინგლისურენოვანი სადოქტორო პროგრამის შემთხვევისა) წყვეტს დარგობრივი კომისია პროსპექტუსის დაცვის დროს. პარტნიორული, ადგილობრივი ან საერთაშორისო თანამშრომლობის შემთხვევაში, ნაშრომის ენის საკითხი წინასწარ შეთანხმდება და დარეგულირდება შეთანხმებით;(ცვლილება 17.02.2020);

11.3. დისერტაციაში ნაწილის სახით უნდა შევიდეს შემაჯამებელი რეზიუმე ინგლისურ ენაზე, რომელშიც წარმოდგენილია სადისერტაციო ნაშრომის ძირითადი სამეცნიერო შედეგები, დასაბუთებულია მათი სამეცნიერო სიახლე, ღირებულება და აქტუალობა შესაბამის სამეცნიერო დისციპლინაში. იმ შემთხვევაში, თუ ნაშრომი შესრულებულია ინგლისურ ენაზე, დისერტაციაში შემაჯამებელი ნაწილის სახით უნდა შევიდეს რეზიუმე როგორც ინგლისურ, ასევე ქართულ ენებზე. (ცვლილება 17.02.2020);

11.4. სადისერტაციო ნაშრომს თან უნდა ახლდეს:

- ა) ცნობა დაგროვებული კრედიტების შესახებ;
- ბ) ხელმოწერილი განაცხადი, რომ სადისერტაციო ნაშრომი დოქტორანტის დამოუკიდებელი კვლევის შედეგია და არ შეიცავს პლაგიატს;
- გ) დოქტორანტის სამეცნიერო ხელმძღვანელის, ასევე თანახელმძღვანელის დასკვნა სადისერტაციო ნაშრომის დაცვისთვის მზაობის შესახებ;
- დ) ილიას სახელმწიფო უნივერსიტეტის ხარისხის უზრუნველყოფის სამსახურის და შესაბამისი დარგობრივი კომისიის დასკვნები დოქტორანტის საერთაშორისო პუბლიკაციის/პუბლიკაციების ამ დებულებით განსაზღვრულ მოთხოვნებთან შესაბამისობის შესახებ;

11.5. საბუნებისმეტყველო მეცნიერებების მიმართულებით სადისერტაციო ნაშრომი შეიძლება ასევე წარმოადგენდეს გამოქვეყნებული ნაშრომების კომპილაციას, თუ (1) დისერტანტს აქვს სადისერტაციო თემით გამოქვეყნებული სულ ცოტა 4 სამეცნიერო სტატია Clarivate Analytics Web of Science-ის ბაზაში შემავალ 0.5-ზე მაღალი იმპაქტ-ფაქტორის მქონე თემატურ ჟურნალში, ან Scopus-ის ნუსხაში შემავალ 0.5-ზე მაღალი ციტირების ქულის (CiteScore) მქონე თემატურ ჟურნალში,(2) აქედან ორ ან მეტ სტატიაში დისერტანტი უნდა იყოს პირველი ავტორი. ამ შემთხვევაში დისერტანტმა უნდა მოამზადოს (ა) თავფურცელი, სადაც მოცემულია დისერტაციის სათაური, დისერტაციის ავტორი, მისი მისამართი და სამუშაო ადგილი, ხელმძღვანელი ან ხელმძღვანელები, მადლობები და თანდართული შრომების ნუსხა; (ბ) დისერტაციის ვრცელი აბსტრაქტი ქართულ ენაზე (5000-7000 სიტყვა + საჭიროებისამებრ სურათები), რომელიც მოკლედ ახასიათებს თანდართული სამეცნიერო პუბლიკაციების საერთო თემას, ზოგად მეთოდოლოგიურ მიდგომას და შედეგებს დისკუსიის სახით; (გ) ერთად აკინძული გამოქვეყნებული ან გამოსაქვეყნებლად მიღებული სამეცნიერო პუბლიკაციების ასლები. გამოსაქვეყნებლად მიღებული პუბლიკაციის შემთხვევაში, დისერტანტი ვალდებულია, ხელნაწერს დაურთოს წერილი რედაქციიდან, რომელიც ადასტურებს, რომ ნაშრომი მიღებულია გამოსაქვეყნებლად. სურვილისამებრ, დისერტანტს, იმ შემთხვევაში, თუ მის მიერ გამოქვეყნებული ნაშრომების რაოდენობა შეადგენს 4-ს, შეუძლია დაუმატოს ამ გამოქვეყნებულ 4 სტატიას ჯერ გამოუქვეყნებელი ერთი ან ორი სტატიის ხელნაწერი. სადისერტაციო ნაშრომმა უნდა გაიაროს შიდა რეცენზირება, რომელშიც რეცენზენტმა ზოგადად უნდა მიმოიხილოს დისერტაციაში შესული გამოქვეყნებული სტატიებიც;

11.6. წარმოდგენილი დისერტაცია უნდა მიეწოდოს ფაკულტეტის მიერ სადისერტაციო საბჭოს წევრებსა და რეცენზენტებს. დისერტაციის გაცნობის, განხილვისა და შენიშვნებისათვის სადისერტაციო საბჭოს წევრებსა და რეცენზენტებს აქვთ ვადა არაუმეტეს ორი თვისა.



სადისერტაციო საბჭო და რეცენზენტები მიღებული შენიშვნებისა და რეკომენდაციების გათვალისწინებით უნიშნავენ დოქტორანტს შესაბამის ვადას რეკომენდაციების გასათვალისწინებლად. შენიშვნები და რეკომენდაციები ეგზავნება დოქტორანტს. შესაბამისი ვადის გასვლის შემდეგ, ინიშნება დისერტაციის დაცვა გარდა იმ შემთხვევისა, როდესაც ნაშრომი არ არის მისაღები დაცვისთვის. სადისერტაციო ნაშრომის დაცვაზე დოქტორანტმა უნდა შეძლოს შენიშვნების, რეკომენდაციების გათვალისწინების შესაბამისად სადოქტორო ნაშრომის ვიზუალიზაცია ან თუ არ გაითვალისწინა შენიშვნები, რეკომენდაციები, არგუმენტირებულად უნდა მოახდინოს თავისი პოზიციის დაცვა საბჭოს წინაშე.

## **მუხლი 12. საერთაშორისო გამოქვეყნების ვალდებულება**

12.1. დისერტაციის დაცვამდე დოქტორანტს შესაბამის სფეროში გამოქვეყნებული (ან ჟურნალის რედაქციისგან მიღებული გამოსაქვეყნებლად) უნდა ჰქონდეს სულ მცირე 2 სამეცნიერო სტატია Clarivate Analytics Web of Science - ის ბაზაში შემავალ 0.5-ზე მაღალი იმპაქტ-ფაქტორის მქონე თემატურ ჟურნალში ან Scopus-ის ნუსხაში შემავალ 0.5-ზე მაღალი ციტირების ქულის (CiteScore) მქონე თემატურ ჟურნალში. სამეცნიერო პუბლიკაციაში მითითებული უნდა იყოს ილიას სახელმწიფო უნივერსიტეტის სახელი;

12.2. გამოქვეყნებული პუბლიკაციებიდან დოქტორანტი უნდა იყოს სულ მცირე ერთი სამეცნიერო სტატიის პირველი ან მეორე ავტორი. დარგობრივი კომისია ფაკულტეტს წარუდგენს შესაბამისი ჩანაწერის მქონე სხდომის ოქმს სადოქტორო ნაშრომთან პუბლიკაციების შესაბამისობის შესახებ. ასეთი შესაბამისობის დადასტურების შემთხვევაში პუბლიკაციები ეგზავნება ხარისხის უზრუნველყოფის სამსახურს, რომელიც ამზადებს დასკვნას ამ დებულებით განსაზღვრულ მოთხოვნებთან პუბლიკაციების შესაბამისობის შესახებ. დარგობრივი კომისიის ან უნივერსიტეტის ხარისხის უზრუნველყოფის სამსახურის უარყოფითი დასკვნის შემთხვევაში საერთაშორისო გამოქვეყნების ვალდებულება არ ჩაეთვლება დოქტორანტს დაკმაყოფილებულად.

## **მუხლი 13. სადისერტაციო საბჭოს შექმნა, რეცენზენტების დანიშვნა და სადისერტაციო ნაშრომის შეფასება**

13.1. დარგობრივი კომისიის და ხარისხის უზრუნველყოფის სამსახურის დადებითი დასკვნების მიღების შემდეგ, გონივრულ ვადაში, დარგობრივი კომისია მიმართავს ფაკულტეტის საბჭოს სადისერტაციო საბჭოს ფორმირებისა და რეცენზენტების (მინიმუმ 2) დანიშვნის მოთხოვნით;

13.2. რეცენზენტების ნომინირებისას დარგობრივი კომისია ხელმძღვანელობს შემდეგი მოთხოვნების გათვალისწინებით:

ა) რეცენზენტები შეიძლება იყვნენ უნივერსიტეტის პროფესორი/ასოცირებული პროფესორი/ასისტენტ-პროფესორი/ პროფესორ-ემერიტუსი/ მეცნიერ-თანამშრომელი ან მოწვეული პირები (ადგილობრივი ან საერთაშორისო საგანმანათლებლო/კვლევითი დაწესებულებიდან/კვლევითი ინსტიტუტიდან), რომლებსაც აქვთ დოქტორის აკადემიური ხარისხი, დოქტორანტის საკვლევი თემის შესაბამისი სამეცნიერო-კვლევითი გამოცდილება და დარგის სპეციფიკიდან და განვითარებიდან გამომდინარე, არიან უახლესი ცოდნით აღჭურვილი, აქტიური მონაწილეობა აქვთ მიღებული სამეცნიერო კვლევებში ან/და გამოქვეყნებული აქვთ სამეცნიერო ნაშრომი, რომლებიც შეესაბამება დოქტორანტის სადისერტაციო ნაშრომის ზოგად თემატიკას/მიმართულებას. იმ შემთხვევაში, თუ სადისერტაციო ნაშრომი შესრულებულია ინგლისურ ენაზე, რეცენზენტებს უნდა ჰქონდეთ ინგლისური ენის კომპეტენცია;

ბ) რეცენზენტებსა და დოქტორანტს/ხელმძღვანელებს შორის არ უნდა არსებობდეს ინტერესთა კონფლიქტი, (მაგ. მიმდინარე პროექტებში თანამშრომლობა და სხვა), რაც რეცენზენტობის კანდიდატმა უნდა დაადასტუროს ხელმოწერით;

13.3. სადისერტაციო საბჭოს მუშაობას ესწრება ფაკულტეტის ადმინისტრაციის წარმომადგენელი, რომელიც აფორმებს სათანადო დოკუმენტებს;

13.4. სადისერტაციო ნაშრომის შეფასება მიმდინარეობს შემდეგი სისტემით:

ა) ფრიადი (summa cum laude) – შესანიშნავი ნაშრომი;

ბ) ძალიან კარგი (magna cum laude) – შედეგი, რომელიც წაყენებულ მოთხოვნებს ყოველმხრივ აღემატება;

გ) კარგი (cum laude) – შედეგი, რომელიც წაყენებულ მოთხოვნებს აღემატება;

დ) საშუალო (bene) – საშუალო დონის ნაშრომი, რომელიც წაყენებულ ძირითად მოთხოვნებს აკმაყოფილებს;

ე) დამაკმაყოფილებელი (rite) – შედეგი, რომელიც, ხარვეზების მიუხედავად, წაყენებულ მოთხოვნებს მაინც აკმაყოფილებს;

ვ) არადამაკმაყოფილებელი (insufficient) – არადამაკმაყოფილებელი დონის ნაშრომი, რომელიც ვერ აკმაყოფილებს წაყენებულ მოთხოვნებს მასში არსებული მნიშვნელოვანი ხარვეზების გამო;

ზ) სრულიად არადამაკმაყოფილებელი (sub omni canone) – შედეგი, რომელიც წაყენებულ მოთხოვნებს სრულიად ვერ აკმაყოფილებს.

13.5. საბოლოო შეფასებას სადისერტაციო საბჭოს წევრები წერენ კონსენსუსის გზით;

13.6. თუ დისერტანტმა მიიღო უარყოფითი შეფასება - „არადამაკმაყოფილებელი (insufficient) – არადამაკმაყოფილებელი დონის ნაშრომი, რომელიც ვერ აკმაყოფილებს წაყენებულ მოთხოვნებს მასში არსებული მნიშვნელოვანი ხარვეზების გამო“, მან გადამუშავებული ნაშრომი უნდა წარადგინოს ერთი კალენდარული წლის განმავლობაში, მიუხედავად სტუდენტის სტატუსისა. აღნიშნული ვადის ამოწურვის შემდეგ, იმ შემთხვევაში, თუ დოქტორანტი არ წარმოადგენს გადამუშავებულ ნაშრომს, დოქტორანტი აკადემიური ჩამორჩენილობის გამო გაირიცხება უნივერსიტეტიდან. ხოლო, თუ დისერტანტმა მიიღო შეფასება - „სრულიად არადამაკმაყოფილებელი (sub omni canone) – შედეგი, რომელიც წაყენებულ მოთხოვნებს სრულიად ვერ აკმაყოფილებს“ მან უნდა წარადგინოს ახალი ნაშრომი სადისერტაციო საბჭოს მიერ დადგენილ ვადებში.

#### **მუხლი 14. დისერტაციის დაცვა**

14.1. დისერტაციის დაცვა არის საჯარო და ხდება სადისერტაციო საბჭოს წინაშე. დისერტაციის დაცვის შესახებ ინფორმაცია (ადგილი, დრო, თარიღი) ქვეყნდება უნივერსიტეტის ოფიციალურ ვებგვერდზე ნაშრომის დაცვამდე ერთი კვირით ადრე;

14.2. დაცვის ენა არის ქართული, თუ დარგობრივი კომისიის გადაწყვეტილებით სხვა რამ არ არის დადგენილი. ინგლისურენოვანი სადოქტორო პროგრამის შემთხვევაში სადისერტაციო ნაშრომის დაცვა ხდება ინგლისურ ენაზე;(ცვლილება 17.02.2020);

14.3. დაცვის პროცესის ხანგრძლივობას და რეგლამენტს ადგენს სადისერტაციო საბჭო;

14.4. დაცვის პროცესი ითვალისწინებს დოქტორანტის მიერ ნაშრომის წარდგენას, რეცენზიების მოსმენას, სამეცნიერო კამათს და სადისერტაციო საბჭოს გადაწყვეტილებას;

14.5. ხელმძღვანელს აქვს დაცვაზე დასწრების უფლება. დისერტაციის და დისერტანტის შესახებ ის მოსაზრებას გამოთქვამს იმ შემთხვევაში, თუ სადისერტაციო საბჭო მას შეკითხვით მიმართავს;

14.6. დისერტაციის დაცვის შეფასება ხდება 13.4 პუნქტში მოცემული სისტემის მიხედვით.

14.7. პარტნიორული, ადგილობრივი ან საერთაშორისო თანამშრომლობის შემთხვევაში, დისერტაციის დაცვის ორგანიზების საკითხი დარეგულირდება საერთაშორისო, ადგილობრივი, ან საპარტნიორო შეთანხმებით.

### **მუხლი 15. ხარისხის მინიჭება და გამოქვეყნების ვალდებულება**

- 15.1. დოქტორანტს აკადემიურ ხარისხს ანიჭებს საბუნებისმეტყველო მეცნიერებებისა და მედიცინის ფაკულტეტის შესაბამისი დარგის/სპეციალობის სადისერტაციო საბჭო;
- 15.2. სადისერტაციო საბჭოს გადაწყვეტილება საბოლოოა;
- 15.3. დოქტორანტის მიერ 13.6. პუნქტით გათვალისწინებული უფლების გამოყენების შემდეგ, სადისერტაციო საბჭოს მიერ ისევ უარყოფითი გადაწყვეტილების მიღების შემთხვევაში, დოქტორანტს უწყდება სტუდენტის სტატუსი სწავლის შედეგების მიუღწევლობის გამო;
- 15.4. ფაკულტეტის ადმინისტრაცია ვალდებულია, დისერტაციის დაცვის შემდეგ ერთი თვის ვადაში ატვირთოს დისერტაცია უნივერსიტეტის ვებგვერდზე;
- 15.5. დოქტორის აკადემიური ხარისხის დამადასტურებელი დიპლომი გაცემა დისერტაციის უნივერსიტეტის ვებგვერდზე ატვირთვის შემდეგ.

### **თავი V. დავები, დოქტორანტის სტატუსის შეწყვეტა და დოქტორის აკადემიური ხარისხის ჩამორთმევა**

#### **მუხლი 16. გასაჩივრების პროცედურა**

დოქტორანტურაში სწავლის პროცესში წარმოქმნილ ნებისმიერ პრობლემას, წერილობითი განცხადების საფუძველზე, განიხილავს დარგობრივი კომისია.

#### **მუხლი 17. დოქტორანტის სტატუსის შეწყვეტა/შეჩერება**

დოქტორანტის სტატუსის შეწყვეტა ან შეჩერება ხდება საუნივერსიტეტო წესისა და ამ დებულების მიხედვით:

- ა) თუ დოქტორანტი ზედიზედ ორჯერ ვერ დაიცავს პროსპექტუსს ან დისერტაციას, რაც ითვლება აკადემიურ ჩამორჩენილობად;
- ბ) თუ დოქტორანტის მიერ დარღვეულია უნივერსიტეტში მოქმედი ეთიკის კოდექსი და სხვა საუნივერსიტეტო წესები;
- გ) თუ დადასტურდა პლაგიატის ან მონაცემების გაყალბების შემთხვევა;
- დ) თუ დოქტორანტი არ ან ვერ შეასრულებს პროგრამით გათვალისწინებულ მოთხოვნებს ხელშეკრულებით დადგენილ ვადებში, რაც ითვლება აკადემიურ ჩამორჩენილობად;
- ე) და სხვა საქართველოს კანონმდებლობით ან საუნივერსიტეტო წესებით დადგენილ შემთხვევებში.

#### **მუხლი 18. დოქტორის აკადემიური ხარისხის ბათილობა**

- 18.1. დარგობრივი კომისიის გადაწყვეტილებით, აკადემიური საბჭოს წინაშე შეიძლება დაისვას დოქტორის აკადემიური ხარისხის ბათილობის საკითხი აკადემიური და კვლევის ეთიკის ნორმების დარღვევის შემთხვევაში;
- 18.2. აკადემიური ხარისხი ბათილად იქნება ცნობილი, თუ დოქტორანტის სამეცნიერო ნაშრომში დადგინდა პლაგიატი;
- 18.3. აკადემიური საბჭო ამ გადაწყვეტილებას იღებს თავად ან ქმნის შესაბამის კომისიას.

#### **მუხლი 19. დოქტორანტურაში სწავლის საფასური**

19.1. სადოქტორო პროგრამის მოთხოვნების ამ მუხლის 19.3 პუნქტში გაწერილი ვადების შესაბამისად დაკმაყოფილების შემთხვევაში, დოქტორანტურაში სწავლა უფასოა 5 წლის განმავლობაში. სწავლა ფასიანია უცხო ქვეყნის მოქალაქისთვის გარდა გამონაკლისი

შემთხვევებისა. შესაძლებელია აგრეთვე, დოქტორანტურაში მიღება გამოცხადდეს ფასიან ადგილებზე;

19.2. დოქტორანტურაში სწავლის შესაბამისი სემესტრიდან სადოქტორო პროგრამის მოთხოვნების ვადაში შეუსრულებლობისას ამ მუხლის 19.3 პუნქტის შესაბამისად ან სწავლის მეექვსე წლიდან დოქტორანტმა უნდა გადაიხადოს იმ დროისათვის დადგენილი სწავლის საფასური;

19.3. თუ დოქტორანტს ჩარიცხვიდან და სწავლის დაწყებიდან 1 წლის შემდეგ არ ექნება დაცული პროსპექტუსი, ან ვერ დაიცავს პროსპექტუსს კომისიის წინაშე (განმეორებითი დაცვის შემდეგაც) და სწავლის მე-8 სემესტრის ბოლოს არ აქვს გამოქვეყნებული სულ მცირე ერთი პუბლიკაცია მოთხოვნების შესაბამისად, მან უნდა გადაიხადოს სწავლის საფასური ყოველი შემდეგი სემესტრისათვის უნივერსიტეტში დადგენილი საფასურის რაოდენობითა და წესით. იმ შემთხვევაში, თუ სტუდენტი პროგრამით გათვალისწინებული მოთხოვნების შესრულების მიზნით, 5 წლის შემდეგ დამატებით აფორმებს ერთწლიან ხელშეკრულებას, მას ეკისრება სწავლის გადასახადი ხელშეკრულების გაფორმების დროისთვის განსაზღვრული სწავლის გადასახადის ოდენობით. იმ შემთხვევაში, თუ სტუდენტმა ვერ შეასრულა პროგრამით გათვალისწინებული მოთხოვნები დამატებითი კონტრაქტის დასრულების შემდეგ, მას უწყდება სტუდენტის სტატუსი.

## **თავი VI. გარდამავალი დებულებები**

### **მუხლი 20.**

20.1. ამ დებულების მე-12 მუხლით განსაზღვრული მოთხოვნები ეხება წინა წლებში ჩარიცხულ დოქტორანტებსაც.

20.2. ამ დებულებით განსაზღვრული მოთხოვნების (სამეცნიერო პუბლიკაციის პირველი ან მეორე ავტორობა, შესაბამისობა სადისერტაციო ნაშრომთან) დაკმაყოფილებისაგან შეიძლება გათავისუფლდეს:

ა) 2008 წლის 20 მარტიდან 2015 წლამდე ჩარიცხული ყველა მიმართულების დოქტორანტი, რომელიც წარმოადგენს 12.1 პუნქტით განსაზღვრულ ჟურნალებში გამოქვეყნებულ 2 (ორ) სამეცნიერო სტატიას;

ბ) 2008 წლის 20 მარტამდე ჩარიცხული ყველა მიმართულების დოქტორანტი, რომელიც წარმოადგენს 12.1 პუნქტით განსაზღვრულ ჟურნალებში გამოქვეყნებულ 1 (ერთ) სამეცნიერო სტატიას.

20.3. დებულებით განსაზღვრული სწავლის ვადის ამოწურვის შემთხვევაში, 2015 წლამდე ჩარიცხულ დოქტორანტებთან ახალი ხელშეკრულების გაფორმების შემდეგ ამოქმედდეს წინამდებარე დებულების მე-12 მუხლით განსაზღვრული მოთხოვნები.